

თვითმმართველი ქალაქის - ბათუმის საკრებულო

დადგენილება №46

2012 წლის 6 აგვისტო ქალაქი ბათუმი

საარჩევნო პლაკატების განთავსებასთან დაკავშირებული ზოგიერთი საკითხის მოწესრიგების შესახებ

საქართველოს ორგანული კანონის „საქართველოს საარჩევნო კოდექსი“-ს 46-ე მუხლის შესაბამისად, თვითმმართველი ქალაქის - ბათუმის საკრებულო ა დ გ ე ნ ს :

1. საქართველოს ორგანული კანონით „საქართველოს საარჩევნო კოდექსი“-თ დადგენილი წესითა და შეზღუდვების გათვალისწინებით, ბეჭდვითი სააგიტაციო მასალის გავრცელება (გამოფენა), მათ შორის საარჩევნო პლაკატების გაკვრა დასაშვებია თვითმმართველ ქ. ბათუმის მთელს ტერიტორიაზე არსებულ ყველა ობიექტზე (შენობა-ნაგებობაზე და სხვა), გარდა წინამდებარე დადგენილების მეორე პუნქტით გათვალისწინებული და მესამე პუნქტით გათვალისწინებულ ტერიტორიულ ზონაში მდებარე ობიექტებისა;

2. განისაზღვროს თვითმმართველ ქ. ბათუმის ტერიტორიაზე არსებული საკულტო შენობა-ნაგებობების და კულტურული მემკვიდრეობის შენობა-ნაგებობების ჩამონათვალი, რომლებზეც აკრძალულია საარჩევნო პლაკატების გაკვრა, ასევე, სახელმწიფო ხელისუფლებისა და ადგილობრივი თვითმმართველობის ორგანოების, სასამართლოების, პროკურატურის, სამხედრო შენაერთებისა და პოლიციის შენობა-ნაგებობების ჩამონათვალი, რომლის ინტერიერსა და ექსტერიერში აკრძალულია საარჩევნო პლაკატების გაკვრა:

ა) საკულტო შენობა-ნაგებობების ჩამონათვალი, თანახმად დანართი 1-სა;

ბ) კულტურული მემკვიდრეობის შენობა-ნაგებობების ჩამონათვალი, თანახმად დანართი 2-სა;

გ) სახელმწიფო ხელისუფლებისა და ადგილობრივი თვითმმართველობის ორგანოების, სასამართლოების, პროკურატურის, სამხედრო შენაერთებისა და პოლიციის შენობა-ნაგებობების ჩამონათვალი, თანახმად დანართი 3-სა;

3. გარდა წინამდებარე დადგენილების მეორე პუნქტით გათვალისწინებული შენობა-ნაგებობებისა, აკრძალულია საარჩევნო პლაკატების გაკვრა:

ა) თვითმმართველ ქ. ბათუმის ტერიტორიაზე განთავსებულ ყველა საგზაო ნიშანზე;

ბ) თვითმმართველ ქ. ბათუმის ტერიტორიაზე მდებარე, თამარ მეფის გამზირზე, ბაქოს ქუჩაზე, იაკობ გოგებაშვილის ქუჩაზე, შოთა რუსთაველის ქუჩაზე, შერიფ ხიმშიაშვილის ქუჩაზე, შიხ ნახიან მახარაქ ალ ნახიანის ხეივანში და მის ორივე მხარეს არსებულ ქუჩაზე, ლეხ და მარია კაჩინსკების ქუჩაზე, ლეხ და მარია კაჩინსკების ქუჩის გაგრძელებიდან ბათუმის აეროპორტის შესასვლელამდე არსებულ ქუჩაზე და ბათუმის ზღვისპირა ბულვარის (ძველი და ახალი ბულვარის ტერიტორია) ტერიტორიაზე არსებულ ყველა გარე განათების ბოძზე;

გ) შავშეთისა და ბაქოს ქუჩების გადაკვეთიდან იაკობ გოგებაშვილისა და ილია ჭავჭავაძის ქუჩის კვეთასთან არსებულ წრიულამდე ბაქოს ქუჩის ორივე მხარეს, იაკობ გოგებაშვილისა და ილია ჭავჭავაძის ქუჩის კვეთასთან არსებული წრიულიდან ალექსანდრე გრიბოედოვის ქუჩის კვეთამდე ილია ჭავჭავაძის ქუჩის ლუწ მხარეს, ილია ჭავჭავაძისა და ალექსანდრე გრიბოედოვის ქუჩების კვეთიდან ალექსანდრე გრიბოედოვის ქუჩისა და მისი გაგრძელების წარმოსახვითი ხაზის გავლით შავი ზღვის სანაპირომდე ალექსანდრე გრიბოედოვის ქუჩის კენტ მხარეს, აღნიშნული ადგილიდან ზღვის სანაპიროს გავლით შავშეთის ქუჩის გაგრძელების წარმოსახვით ხაზთან გადაკვეთამდე ზღვის სანაპიროს ჩათვლით და აღნიშნული ადგილიდან წარმოსახვითი ხაზის შავშეთის ქუჩასთან შეერთებამდე მოქცეულ ტერიტორიულ ზონაში არსებულ ყველა შენობა-ნაგებობაზე (ტექსტური ნაწილი);

დ) ბათუმის ზღვისპირა ბულვარის იმ ტერიტორიაზე (ძველი და ახალი ბულვარის ტერიტორია) არსებულ ყველა შენობა-ნაგებობაზე, რომელიც არ არის მოქცეული ამ პუნქტის „გ“ ქვეპუნქტით გათვალისწინებულ ტერიტორიულ ზონაში (ტექსტური ნაწილი);

4. წინამდებარე დადგენილების მე-3 პუნქტის „გ“ და „დ“ ქვეპუნქტებით გათვალისწინებულ ტერიტორულ ზონაში განისაზღვროს ადგილები, სადაც საარჩევნო პლაკატების გასაკრავად და გამოსაფენად განთავსდება სტენდები:

ა) ევროპის მოედანი;

ბ) საოცრებათა მოედანი;

გ) ქ. ბათუმის მერიის ადმინისტრაციული შენობის წინ (მის: ქ. ბათუმი, ლუკა ასათიანის ქ. №25) არსებული სკვერი;

დ) ნიკოლოზ ბარათაშვილისა და ილია ჭავჭავაძის ქუჩების კვეთაში, ეკლესიის მიმდებარედ არსებული სკვერი;

ე) ახალ ბულვარში რესტორან „აჭარული სახლი“-სა და რესტორან „კომპი“-ს მიმდებარე ტერიტორია;

ვ) ახალ ბულვარში აკვაპარკის მიმდებარე ტერიტორია;

ზ) ახალ ბულვარში ამფითეატრის ტერიტორია;

5. წინამდებარე დადგენილების მე-4 პუნქტით გათვალისწინებულ ადგილებზე განთავსდეს თანაბარი რაოდენობის სტენდები.

6. წინამდებარე დადგენილების მე-4 პუნქტით გათვალისწინებულ თითოეულ ადგილებზე განთავსებული სტენდები რეგისტრირებულ საარჩევნო სუბიექტებზე განაწილდეს თანაბრად. ამ მიზნით ქ. ბათუმის მერია ვალდებულია თითოეულ სტენდზე განათავსოს შესაბამისი საინფორმაციო ნიშანი.

7. დამტკიცდეს წინამდებარე დადგენილების მე-3 პუნქტის „გ“ და „დ“ ქვეპუნქტებით გათვალისწინებული ტერიტორიული ზონის საზღვრების რუკა, თანახმად დანართი 4-სა (გრაფიკული ნაწილი).

8. წინამდებარე დადგენილების მე-3 პუნქტის „გ“ და „დ“ ქვეპუნქტებით გათვალისწინებული ტერიტორიული ზონის ტექსტურ ნაწილსა და გრაფიკულ ნაწილს შორის წინააღმდეგობისას უპირატესობა ენიჭება ტერიტორიული ზონის გრაფიკულ ნაწილს.

9. წინამდებარე დადგენილების აღსრულება და ამ მიზნით შესაბამისი ორგანიზაციულ-სამართლებრივი ღონისძიებების გატარება დაევალოს ქ. ბათუმის მერიას (რ. ჩხაიძე).

10. დადგენილება შეიძლება გასაჩივრდეს ბათუმის საქალაქო სასამართლოში (მის: ქ. ბათუმი, ზუბალაშვილის ქ. №30) უშუალო ზიანის მიყენებიდან სამი თვის ვადაში.

11. დადგენილება ძალაშია გამოქვეყნებისთანავე.

საკრებულოს თავმჯდომარე

გიორგი კირთაძე